

Laporan tentang Kesan Penyalahgunaan Bahasa Melayu di Media Sosial dan Langkah untuk Mengatasinya

1.0 Pendahuluan

Dalam era digital yang semakin berkembang, media sosial telah menjadi platform utama bagi masyarakat untuk berkomunikasi dan berkongsi maklumat. Bahasa Melayu, sebagai bahasa kebangsaan Malaysia, sering digunakan dalam pelbagai bentuk interaksi di media sosial seperti Facebook, Tiktok, Instagram, dan lain-lain. Walau bagaimanapun, penggunaan bahasa Melayu di media sosial kurang memenuhi dan mematuhi tatabahasa serta ejaan yang betul.

Penyalahgunaan bahasa Melayu di media sosial berpotensi memberikan kesan yang negatif kepada pengguna, terutamanya golongan muda yang lebih terdedah kepada pengaruh-pengaruh yang muncul di kaca peranti pintar mereka. Laporan ini bertujuan untuk mengkaji kesan penyalahgunaan bahasa Melayu di media sosial dan mencadangkan langkah-langkah yang boleh diambil untuk mengatasinya.

2.0 Jawatankuasa

Pengerusi: Muhammad Anazhakimi Bin Mohammad

Naib Pengerusi: Tengku Farisha Elliana Binti Tengku Hamzah

Setiausaha: Muhammad Harith Bin Zulhairi

Bendahari: Nur Auni Marissa Binti Mohammad Amin

Ahli jawatankuasa: Muhammad Adam Sufi Bin Amier (AJK Perhubungan Luar)

3.0 Kesan Penyalahgunaan Bahasa Melayu di Media Sosial

3.1 Penurunan Kualiti Bahasa

Salah satu kesan utama penyalahgunaan bahasa Melayu di media sosial ialah penurunan kualiti bahasa itu sendiri. Penggunaan bahasa rojak, singkatan yang tidak rasmi, serta ejaan yang salah menjadi kebiasaan dalam kalangan pengguna media sosial. Contoh yang sering dilihat termasuk penggunaan kata-kata seperti "x" untuk "tidak" dan "u" untuk "kamu." Amalan ini bukan sahaja menjejaskan kualiti penulisan, tetapi juga boleh mempengaruhi pemahaman dan penggunaan bahasa yang betul dalam kalangan masyarakat. Generasi muda khususnya berisiko kehilangan keupayaan untuk menulis dan bertutur dalam bahasa Melayu yang baku dan betul, yang akhirnya boleh mengurangkan tahap penguasaan bahasa kebangsaan.

3.2 Pengaruh Negatif Terhadap Identiti dan Kebudayaan

Bahasa merupakan elemen penting dalam identiti dan kebudayaan sesuatu bangsa. Penyalahgunaan bahasa Melayu di media sosial boleh menyebabkan kemerosotan identiti kebangsaan. Apabila bahasa digunakan secara tidak tepat dan bercampur dengan bahasa asing, ia boleh melemahkan keunikan dan keaslian budaya Melayu.

Sebagai contoh, bahasa rojak yang sering digunakan dalam di Instagram atau Facebook, seperti "Saya pergi shopping dengan mummy dan daddy" merosakkan keaslian bahasa Melayu dan mencampuradukkan dengan bahasa asing. Identiti kebangsaan yang kuat memerlukan penggunaan bahasa yang betul dan konsisten. Sekiranya trend penyalahgunaan bahasa terus berleluasa, ia boleh menyebabkan generasi muda hilang jati diri dan kurang menghargai warisan budaya mereka.

3.3 Kemerosotan Terhadap Prestasi Akademik

Penyalahgunaan bahasa Melayu di media sosial juga mempunyai implikasi serius terhadap sistem pendidikan. Pelajar yang terbiasa dengan bahasa yang tidak formal di media sosial cenderung membawa gaya penulisan yang sama ke dalam tugas akademik mereka. Contohnya, pelajar yang terbiasa dengan bahasa tidak formal di media sosial, seperti penggunaan "u" untuk "awak" atau "dpt" untuk "dapat" membawa gaya penulisan ini ke dalam tugas akademik mereka, mengakibatkan kesalahan dalam penulisan esei dan peperiksaan. Ini boleh menjejaskan prestasi mereka dalam subjek Bahasa Melayu di sekolah dan menurunkan standard pendidikan secara keseluruhan. Guru-guru menghadapi cabaran untuk membetulkan kesalahan bahasa yang dibawa dari media sosial dan memastikan pelajar memahami serta menggunakan bahasa Melayu dengan betul dan berkesan.

3.4 Kemerosotan Nilai Estetika Bahasa

Bahasa Melayu yang indah dan kaya dengan nilai estetika boleh merosot kualitasnya akibat penyalahgunaan di media sosial. Pantun, syair, dan peribahasa yang merupakan warisan budaya bangsa mungkin dilupakan atau digunakan dengan cara yang tidak betul. Contohnya, penggunaan yang tidak betul atau pengabaian pantun dan peribahasa dalam penulisan media sosial boleh menyebabkan hilangnya penghargaan terhadap seni bahasa, seperti mengubah pantun menjadi singkatan yang tidak bermakna. Hal ini mengakibatkan kehilangan nilai seni dalam bahasa dan menjadikan Bahasa Melayu kurang menarik untuk dipelajari dan digunakan dengan betul.

3.5 Kesalahfahaman dalam Bersosial

Penyalahgunaan Bahasa Melayu di media sosial juga boleh menimbulkan kesan sosial yang negatif. Bahasa yang digunakan dengan cara yang salah boleh menimbulkan salah faham dan konflik dalam komunikasi. Gaya pertuturan seseorang akan terjejas disebabkan pengaruh bahasa di media sosial yang mendorong kepada faktor pemilihan kata-kata yang tidak tepat dalam sesuatu situasi dan cara penyampaian yang kurang sopan. Sebagai contoh, penggunaan bahasa kasar dan tidak sopan di media sosial, seperti "bodoh" atau "kau ni tak guna" boleh mencetuskan perbalahan dan konflik dalam komuniti dalam talian. Hal ini menyebabkan perbalahan dalam kalangan rakan sebaya, keluarga, dan komuniti. Penggunaan bahasa yang tidak sopan dan kasar juga boleh mencetuskan suasana tidak harmonis dan meningkatkan ketegangan sosial.

4.0 Langkah untuk Mengatasi Kesan Penyalahgunaan Bahasa Melayu di Media Sosial

4.1 Memberikan Pendidikan dan Kesedaran kepada Mereka

Salah satu langkah utama untuk mengatasi isu penurunan kualiti bahasa ialah melalui pendidikan dan kesedaran. Kempen kesedaran mengenai pentingnya penggunaan bahasa Melayu yang betul perlu dipergiatkan. Kementerian Pendidikan boleh bekerjasama dengan sekolah dan institusi pendidikan untuk mengadakan bengkel, ceramah, dan seminar yang menekankan kepentingan tatabahasa dan ejaan yang betul. Penggunaan teknologi, seperti aplikasi pembelajaran bahasa, juga boleh diperkenalkan untuk membantu pelajar memperbaiki penguasaan bahasa mereka. Contohnya, mengadakan bengkel atau seminar mengenai pengenalan terhadap aplikasi pembelajaran bahasa seperti Duolingo khusus untuk Bahasa Melayu.

4.2 Penguatkuasaan Undang-undang dan Polisi Berbahasa

Pihak berkuasa boleh mengambil langkah untuk menguatkuasakan undang-undang terhadap penggunaan bahasa Melayu yang betul di media sosial bagi menjaga identiti dan kebudayaan bahasa. Syarikat-syarikat media sosial boleh diarahkan untuk memantau dan mengawal kandungan yang disiarkan di platform mereka. Sebagai contoh, polisi yang jelas mengenai penggunaan bahasa yang betul boleh diperkenalkan, termasuk denda atau tindakan terhadap pengguna yang berulang kali menyalahgunakan bahasa. Di samping itu, pihak kerajaan boleh mengadakan pertandingan penulisan atau kempen kreatif melalui *posting* di Facebook, Instagram atau Tiktok yang mempromosikan penggunaan bahasa Melayu yang betul dan menarik minat pengguna media sosial.

4.3 Peranan Media dan Pempengaruh dalam Menjadi Duta Bahasa Melayu

Media masa dan influencer di media sosial memainkan peranan penting dalam membentuk sikap dan amalan masyarakat. Mereka boleh menjadi agen perubahan dengan menunjukkan contoh penggunaan bahasa Melayu yang betul dalam kandungan mereka. Contohnya, kerjasama antara media, kerajaan dan pempengaruh untuk mengadakan kempen bersama pempengaruh popular untuk mempromosikan penggunaan Bahasa Melayu yang betul dalam setiap *posting* mereka, serta bekerjasama dengan media massa untuk mengadakan program televisyen yang mendidik tentang penggunaan bahasa yang betul. Pempengaruh yang mempunyai pengaruh besar dalam kalangan golongan muda boleh dijadikan duta bahasa untuk menarik perhatian dan memberi inspirasi kepada pengikut mereka mengenai pentingnya menjaga kualiti bahasa sekali gus mendorong mereka untuk menggunakan bahasa yang betul dalam penulisan akademik mereka.

4.4 Menjalankan Pemantauan di Media Sosial dan Penyelidikan Secara Berterusan

Pemantauan dan penyelidikan berterusan mengenai penggunaan Bahasa Melayu di media sosial perlu dijalankan untuk memahami trend dan pola penggunaan bahasa. Contohnya, institut penyelidikan bahasa boleh bekerjasama dengan pihak universiti

untuk mengkaji dan menganalisis kesalahan bahasa yang sering berlaku. Hasil penyelidikan ini boleh digunakan untuk memperbaiki strategi dan pendekatan dalam mendidik masyarakat tentang penggunaan Bahasa Melayu yang betul. Dengan strategi yang pragmatik seperti menapis kandungan bahasa sebelum memuat naik *posting*, nilai estetika bahasa dapat dipertingkatkan melalui penggunaan peribahasa, syair dan pantun yang tepat setelah ditapis.

4.5 Memperkasakan Kurikulum Bahasa Melayu di Institut Pendidikan

Kurikulum bahasa Melayu di sekolah mahupun di universiti perlu diperkasakan untuk memastikan pelajar memperoleh penguasaan yang mantap dalam bahasa tersebut. Contohnya, modul pembelajaran yang lebih interaktif dan menarik boleh diperkenalkan bagi menarik minat pelajar. Latihan penulisan dan komunikasi yang lebih kerap juga boleh membantu pelajar menguasai tatabahasa dan ejaan yang betul. Penggunaan teknologi dalam pengajaran, seperti aplikasi pembelajaran dan permainan bahasa, boleh meningkatkan minat pelajar terhadap Bahasa Melayu. Dengan penulisan dan komunikasi bahasa Melayu yang betul di peringkat pengajian sekolah mahupun di universiti, ia dapat membentuk jati diri dan adab bahasa yang sopan sekali gus dapat mengelakkan sebarang salah faham sesama sendiri.

5.0 Kesimpulan

Penyalahgunaan Bahasa Melayu di media sosial adalah isu yang serius dan memerlukan perhatian semua pihak. Ia tidak hanya menjejaskan kualiti bahasa dan pendidikan, tetapi juga identiti dan kebudayaan negara. Melalui langkah-langkah yang berkesan seperti pendidikan dan kesedaran, penguatkuasaan dan polisi, peranan media dan pempengaruh, pemerkasaan kurikulum, serta pemantauan dan penyelidikan berterusan, masalah ini boleh diatasi. Semua pihak, termasuk kerajaan, institusi pendidikan, media, dan individu, perlu bekerjasama untuk memastikan Bahasa Melayu digunakan dengan betul dan berkesan di semua platform. Hanya dengan usaha yang berterusan dan komitmen yang kuat, kita dapat memastikan warisan Bahasa Melayu terus terpelihara dan dihargai oleh generasi akan datang.

Laporan disediakan oleh,

9 Jun 2024



MUHAMMAD HARITH BIN ZULHAIRI

Setiausaha Persatuan Bahasa Melayu Universiti Malaysia Pahang

Al-Sultan Abdullah (UMPSA)